

易象管窺

易象管窺卷之十

明嘉禾後學廣寓居士黃正憲著

男承鼎編次

三三

離下  
兌上

革巳日乃孚元亨利貞悔亡

變其故而新之謂革巳日者謂事窮而當革之  
日也元亨利貞卽乾之四德除舊更新非常變  
故四德缺一不可元以事始言所謂以天下之  
大聖行天下之大事也亨者達權通變也利者  
遂事順情也貞者堅固不撓孔子所謂信以成

之也彖傳專重貞字當革之日人心既孚又備四德以善其革是以悔亡蓋革非聖人之得已如成湯放桀于南巢豈非元亨利貞之道乃曰予恐天下以台爲口實此悔心也然聖人雖不能无此心而天下信之後世諒之其悔自亡矣彖曰革水火相息二女同居其志不相得曰革已日乃孚革而信之文明以說大亨以正革而當其悔乃亡天地革而四時成湯武革命順乎天而應乎人革之時大矣哉

火然水乾水決火滅故曰相息中女貞正居內

少女淫說居外故不相得已日而革民固相信然當其任者必以德爲本文明則能徹義理和說則不拂人情故革當而悔亡是革之道時爲之權而德爲之本也天地不革何以定四時而成歲功聖人不革何以撥亂世而反之正此革之時所以爲大也

象曰澤中有火革君子以治歷明時

象意只是說水滅火吳草廬尾閭焦釜之論亦因彖傳水火相息而言也要之水剋火革之常火消水革之變如湯武雖順天應人而以臣伐

君不可不謂革之變天地革而四時成革之常也君子亦道其常而已故以治歷明時曆日月五緯之躔次也曆有差訛則分至啓閉之候不能无差而時不能定矣物類變化人事改易孰從而明其紀哉

初九鞏用黃牛之革象曰鞏用黃牛不可以有爲也

鞏固也黃中色牛順物指六二黃牛之革亦以變革言非謂皮也初爲民從上而革者也二柔中應五當革之任初但鞏固自守以順從之而

已不然任其陽剛之性而妄有變革則干紀悖  
憲是爲亂民可乎哉

六二已日乃革之征吉无咎象曰已日乃革行有  
嘉也

變革之權在君代終之責在臣五以陽剛中正  
主革于上凡事之當革者皆有成斷已日也二  
乃以柔中文明之德應而革之不失之專又不  
失之弛以是進而承君乃行之有嘉者吉莫大  
焉何咎之有彖所謂文明以說大亨以正革而  
當者如此故无咎

九三征凶貞厲革言三就有孚象曰革言三就又何之矣

革貴于中三過剛不中又居離明之極剛過則躁明過則察用是而進有凶道焉必守之以正持之以危凡有變革擬之而後言議之而後動三就者就二四五也如孟子所謂欲有謀焉則就之之意蓋二爲中順之臣四得悔亡之道五爲剛中之主舍是不就又何之哉必三就而後有孚見孚信之難一不就則不孚矣戒之也

九四悔亡有孚改命吉象曰改命之吉信志也

四近五位乃湯武之爲諸侯時也水火之際當  
革之時但以剛居柔不任其剛雖有爲天下之  
志而不能无顧慮之心如湯曰慚德武曰无良  
是也然事勢窮極詩云上帝臨汝無二爾心此  
其時也故雖有悔而可亡何者剛而居柔遵養  
時晦天下已信其志在救民矣已日乃孚而不  
革則百姓有過在予一人何以祇承上帝衽席  
生民故曰有孚改命吉命曆數之命卽彖傳所  
謂湯武革命順乎天而應乎人也

九五大人虎變未占有孚象曰大人虎變其文炳



也

剛中居尊自諸侯而升爲天子矣虎大人之象  
二應于五離之文明自內而炳于外故爲虎變  
四曰改命五曰虎變天命旣新則典章法度國  
勢人心无不一變而更新之如謹權量審法度  
修廢舉逸興滅繼絕之類皆是未占有孚謂不  
必卜之今日未改命之先民志已有孚矣乾之  
飛則曰龍革之變則曰虎要之爲大人則一也  
堯舜揖遜惟德之見故曰龍湯武征伐則有威  
存焉故曰虎

上六君子豹變小人革面征凶居貞吉象曰君子豹變其文蔚也小人革面順以從君也

薛畏齋曰卦至九五革道已成黎民丕變之時也上以陰柔之才而處革之終說之極陰柔說陽從之而革然分限有淺深則所革有大小君子革于德形著而明如豹之變其文蔚然小人革于化面從而已征凶居吉者蓋性安之事可以望聖人而不可以望君子復執之功可以望君子而不可以望小人求過其分則革道不可行安守其正則人各得其所此見聖人革道之

隆也楊誠齋云觀六爻之詞益知聖人之懼革也初戒革之蚤二戒革之專三戒革之躁四戒革之疑上戒革之過五者戒之詳矣然後九五不待占而決也

三三  
巽下  
離上

鼎元吉亨

鼎烹飪之器所以調和在中之實而養人者也元仁也惟仁人爲能享帝養賢以及萬民指六五言而九二上九皆所以輔仁者也亨者天親神饗民懷人輔也

彖曰鼎象也以木巽火亨飪也聖人亨以亨上帝而大亨以養聖賢巽而耳目聰明柔進而上行得中而應乎剛是以元亨

鼎卦之象也初爲趾二三四爲腹離爲目五爲耳上爲鉉亨飪鼎之用也享帝尊以簡爲貴養賢以豐爲貴故曰大亨亨飪之用莫大于此見鼎之取義爲大也聰明而出于巽順則非剛愎自用所謂畜牝牛之吉中道也故雖柔進上行而能應乎剛中是以仁能享帝仁急親賢而鼎養之利无窮吉而亨者以此

象曰木上有火鼎君子以正位凝命

位者天所命也故必正位而後可以凝命卽周書位在德元祈天永命之意正位之道非大順大明不可貞固凝定卦象也巽順離明卦德也故君子有取焉古者傳國以鼎猶後之璽也故傳曰禹鑄鼎象物又曰武王克商遷鼎洛邑及王孫滿之對楚子亦正位凝命之說也

初六鼎顛趾利出否得妾以其子无咎象曰鼎顛趾未悖也利出否以從貴也

初爲鼎趾正應九四以下從上得舍故取新之

義如鼎將受餽必先顛其趾以出否惡雖未有  
實滌以待盛故曰未悖初爲陽六爲陰以初得  
六是得妾也初爲巽主以順爲正妾婦之道也  
爻以先畫者爲尊故震爲長男巽爲長女妾有  
母道二三四諸陽爻以序而來皆其子也鼎足  
雖虛以腹重而鎮定妾雖卑賤以從子而得貴  
故无咎顛趾出否是卦象得妾以子是卦義  
九二鼎有實我仇有疾不我能卽吉象曰鼎有實  
慎所之也我仇有疾終无尤也

實謂亨飪之物實于鼎中者也九二剛而得中

其德足以備亨調之用故爲鼎有實之象我二自我也匹耦曰仇指三言三乃同體之陽故曰我仇三以陽居陽躁進而不食故曰有疾猶云以躁急而受病也二以陽居柔剛中柔順往應六五慎所之也三雖躁動不能累我則鼎中之實終能養人而无尤故吉本義以仇爲初未確九三鼎耳革其行塞雉膏不食方雨虧悔終吉象曰鼎耳革失其義也

二三四爲鼎腹五爲鼎耳三居二四之中實之美者又近離體文明故曰雉膏皮熟曰韋生曰

革三陽剛躁進急欲食人然尚間于四則腹實未滿生而未熟享帝養賢六五之責鼎實未熟則耳未受鉉而舉是鼎耳之革也鼎以耳行行則可以食人革則未可舉而行故曰其行塞雉膏不食如士人涵養未足君心不孚則行義之機尚窒塞而未通雖有美韞何以自售見三之不可躁進也雨陰之潤物指五之寵澤也鼎耳革爲虧膏不食爲悔六五柔中之君方將養賢以及民則三雖始有虧而悔終當有雉膏之食而吉也何以躁進爲



九四鼎折足覆公餗其形渥凶象曰覆公餗信如何也

四居鼎腹之上上而鼎耳繫焉下而鼎趾承焉中而鼎實載焉任至重而以陽居陰與初陰相應是折其足也非惟雉膏不能及物將併其公家之餗而覆之矣先資之謂何渥作劇周禮所謂屋誅也初无位故趾雖顛有出否之利四在位而足折故覆餗而有形渥之凶

六五鼎黃耳金鉉利貞象曰鼎黃耳中以爲實也五于象爲耳鉉貫耳以舉鼎者指上九言二三

四諸陽爲鼎實所以祀天養民者非耳則鼎无由舉非鉉則耳不自舉如賢人有雉膏之實非君弗究其所施而君非良相則無以開誠布公左右輔翼以成其治利貞者任賢勿二之意五柔順中正諸陽賴以成就故曰中以爲實

上九鼎玉鉉大吉无不利象曰玉鉉在上剛柔節也

玉鉉卽金鉉五以君資臣從臣道而論則曰金鉉取九之剛也上以臣濟君從君德而論則曰玉鉉取六之順也以柔順之君又濟之以陽剛

之臣是爲中道而實之所由以爲中者大吉无不利謂享帝養賢以及萬民也卽彖元亨之意

震下  
震上

震亨震來虩虩笑言啞啞震驚百里不喪匕鬯

彖曰震亨震來虩虩恐致福也笑言啞啞後有則也震驚百里驚遠而懼邇也出可以守宗廟社稷以爲祭主也

震以人心慎動言慎則動罔不吉故亨虩虩恐懼貌虩虩虎其性周旋顧慮而不自寧故取象焉謂危懼之心常惺而不息也恐致福者聖人

无徼福之心多恐則能免禍无禍卽爲福故曰  
致福啞啞言笑適和貌敬畏常存則時言時笑  
動有成法不須檢點故曰後有則七舉鼎實之  
器所以載肉而升俎者啞合鬱金之酒所以灌  
地而降神者祭時所用大抵人情專有所向則  
忽然之變不能驚動故平時有兢兢之心常若  
大祭之承則雖當主啞交神之際亦不爲疾雷  
所動而失其七啞豈止笑言啞啞而已哉虞舜  
烈風雷雨弗迷是也出如帝出乎震之出震爲  
長子天之宗子也言出而繼體以作神天之主

也

象曰洊雷震君子以恐懼修省

雷者天之威也詩云畏天之威于時保之此恐懼修省之義也自此心之不放曰恐懼自此心之檢飭曰修省

初九震來虩虩後笑言啞啞吉象曰震來虩虩恐致福也笑言啞啞後有則也

震以心之動言恁地工夫卽中庸戒慎不覩恐懼不聞之意靜中有動所謂常惺惺也動而後慎則无及矣

六二震來厲億喪貝躋于九陵勿逐七日得象曰  
震來厲乘剛也

震來指初九言初陽卒然震動勢甚危厲億度  
也兩貝爲朋坤體三陰爲同類之朋一索而得  
震爲長男以陽易陰故曰喪貝躋升也九卽初  
陽陵土高處也得者喪之反六二柔順中正度  
已喪朋而乘于初陽之上震動危厲勢不可遏  
可與征逐哉勿者禁止之詞陽數之進以六位  
而終則陰復生于下而所喪之貝得矣故曰七  
日得

六三震蘇蘇震行无眚象曰震蘇蘇位不當也

蘇蘇精神散緩之貌三柔不中正下體之震未已而上體之震方來內心无主而外震于事故有蘇蘇之象然震撼擊撞皆動心忍性之地而以陰居陽猶有儆惕之明故能震懼而勉于行則不犯乎陽而无過誤之失蓋人于驚恐中舉動多錯震行卽大象恐懼修省之意所以免眚九四震遂泥象曰震遂泥未光也

人心之動惟初最善以其不染于私意故初之兢兢遇變而謹發乎本心无所因襲此不失七

鬯誠敬之至者也至于重震之交則內有二陰之藏匿外有二陰之牽引且以陽居陰易爲沉溺隨震隨怯終不能振拔有爲以樹光明之業故有遂泥之象

六五震往來厲億无喪有事象曰震往來厲危行也其事在干大无喪也

此億字當訓大五爲君位所謂大寶也初爲震往四爲震來以陰柔托于重震之上詩云不易維王是已必以危厲爲行則殷憂啓聖多難興邦故大寶无喪有事不忘所厲之意申戒之也




危以心言事行之實五柔順中正故曰在中見必中道乃可守位

上六震索索視矍矍征凶震不于其躬于其鄰无咎婚媾有言象曰震索索中未得也雖凶无咎畏鄰戒也

陰居震極惶惑憂懼故有精神恍惚瞻顧不寧之貌如是而有所進則冥行妄動必履凶危矣此皆由平日放肆不知戒懼而然也隣指下三陰爻言能于其震未及躬之時而恐懼修省則中無愧怍庶免索索矍矍之患故无咎婚媾者

孤陰不生自不可无陽之震猶女不可无男也  
但陰柔不知戒則先迷失道而有征凶之咎畏  
隣而戒則後順得常如獲婚媾之和有言卽彖  
辭笑言啞啞之意



艮上  
艮下

艮其背不獲其身行其庭不見其人无咎

一陽止于二陰之上背之象也人之一身耳目  
手足口鼻皆是運用的惟背止而不動故聖人  
于艮止之義取象于背陰陽相感爲和應內外  
皆艮上下敵應不相與言應而未嘗應也內卦

靜以身言故曰不獲其身外卦動以行言故曰  
不見其人大抵人情所最係戀者莫若身程子  
以定言性定卽艮也定性則四大皆幻无我見  
矣故不獲其身无我見則无人見故不見其人  
必忘已而後能忘人佛家所謂无眼耳鼻舌身  
意無色聲香觸法卽不獲不見之意也

彖曰艮止也時止則止時行則行動靜不失其時  
其道光明艮其背止其所也上下敵應不相與也  
是以不獲其身行其庭不見其人无咎也

時止時行以身之動靜言止其所乃性天常定

時境界動亦定靜亦定故曰不失其時身有動靜所無變遷光光淨淨應而無應故曰敵應不相與此以卦義釋卦德也若行時是一箇境界止時又一箇境界是動靜各一其時不勝膠葛闇昧之私矣何以曰其道光明

象曰兼山艮君子以思不出其位

位卽所也人之最難止者心動靜不失其時乃聖人安止地位何思何慮之境若君子不能无思思則便有倚著便有營役而難止矣雷風水火澤兩相往來惟兩山相立各止其所故君子

法其象以爲止心之學不出位欽厥止也雖君臣父子夫婦兄弟之倫物富貴貧賤夷狄患難之事變日用乎前而不獲不見之真體无有出入乃艮背之工夫也純之則爲聖人之安止而動靜不失其時矣

初六艮其趾无咎利永貞象曰艮其趾未失正也腓下爲趾足指也初以陰柔居下體之下故象艮趾如顏子不遠復止不善于初動者也止于初動則如玉之未有瑕玷故云未失正然不能保之于終故以永貞爲利

六二艮其腓不拯其隨其心不快象曰不拯其隨未退聽也

腓足肚居趾之上限之下拯救也初雖止于趾然人心惟危遏絕念頭稍不堅貞將滅而復熾勢必隨而靡矣故曰未退聽不拯讀其隨危之辭快慊也二以陰居陰易于委隨故戒之以足利永貞之意說者謂不能救三未然

九三艮其限列其夤厲薰心象曰艮其限危薰心也

限腰胯骨人身上下之際也夤夾脊肉在限上

猶卦之外體九三爲內體卦主能止二陰于下  
故象艮于限但剛而不中輕進躁動而二陰成  
列在上以二陰牽一陽有力能勝之之勢故象  
列其夤夫二陰方止于下二陰復列于上一陽  
孤處其中爲坎象其勢如熏灼其心者不亦危  
哉上下雖皆艮卦但上居卦極无可復動故有  
敦艮之吉三居卦中猶可遷動故有薰心之厲  
列夤薰心諸家訓爲分裂隔絕之義者非

六四艮其身无咎象曰艮其身止諸躬也

身字與三爻心字關鍵內卦爲心外卦爲身未

有內欲熏心而不見諸躬者四以陰柔難制故以艮其身勉之卽孔子所謂不使不仁者加乎其身之意必如是乃可无咎四陰柔而能此者以兼山之重也

六五艮其輔言有序悔亡象曰艮其輔以中正也居上而偶有口肱而不合之象故爲輔頰輔主出令而不與股肱同運君象也而以陰柔居之宜不能无悔然柔而得中中以出正則語默以時發皆順理故悔亡言有序則行可知實兼六四艮身之義蓋聖人論進德工夫必兼言行乾



之庸言庸行修辭立誠是也言有枝葉行之衰  
故謹行必先信言

上九敦艮吉象曰敦艮之吉以厚終也

內卦九三之止非不厚而復有兼山之重故曰  
敦艮蓋節或移于末路事或廢于垂成人之常  
情能以厚終彖所謂其道光明者也何吉如之  
初言利永貞上言敦艮吉正相首尾

䷳

艮上  
巽上

漸女歸吉利貞

內卦二陰爲一陽所止而不進外卦一陰巽于

二陽而不敢亢有女待時而嫁以順爲正之象  
焉此吉之道也蓋天下之事皆當以柔道漸進  
欲速則不達漸則有次序而利物足以和義矣  
進銳則退速漸則可持久而貞固足以幹事矣  
此所以爲吉也

彖曰漸之進也女歸吉也進得位往有功也進以  
正可以正邦也其位剛得中也止而巽動不窮也  
此專以六四一爻爲主蓋自坤六三而進以陰  
居陰故曰得位下艮則止而不進上巽則進而  
不驟故曰以正其位言四之所遇非指五也蓋

易象管見 卷之一  
五以陽剛中正居尊而四比之是後順得常從  
王有終妻道也臣道也此所以進而能有功也  
有難進之操則廉靖足以表俗有巽從之義則  
和順足以感人此動之所以不窮而邦之所由  
正也彖所謂吉利貞者如此

象曰山上有水漸君子以居賢德善俗

居者謂積之使崇善者謂化之使厚居德象艮  
之止取其自卑而高厚重不遷不漸則不能積  
也善俗象巽之入巽爲風風聲之被自近而遠  
不漸則不遽入也居已于賢而後可以善俗本

義謂二者皆以漸而進或以居賢德作官人者  
非

初六鴻漸于干小子厲有言无咎象曰小子之厲  
義无咎也

鴻水鳥其行有序而進有漸故六爻皆以取象  
干水涯也鴻卑棲則鸞鳩笑之聖賢在下位則  
小人侮之然堅白之操磨不磷涅不緇多見其  
不知量耳何足咎哉

六二鴻漸于磐飲食衎衎吉象曰飲食衎衎不素  
飽也

盤水邊大石衍衍和樂意鴻自干之盤則棲止  
得所飲喙晏如矣二以柔中之才上應九五剛  
中之君惟后非賢不义惟賢非后不食上有安  
富尊榮之樂下无曠瘼尸素之羞故有飲食衍  
衍之象

九三鴻漸于陸夫征不復婦孕不育凶利禦寇象  
曰夫征不復離羣醜也婦孕不育失其道也利用  
禦寇順相保也

高平曰陸鴻水鳥陸非所安凡卦三爻內外之  
限進此則爲外體猶士人離家而觀光上國也

家齊而後國可治此處最宜理會非可苟安之地故象鴻漸于陸本爻爲初二兩陰所從有夫婦唱隨之義焉而外與四比若輕進躁動征而不返則離初二之羣類而失夫婦之道孕育不成家且不齊惡能治國故凶艮體有蔽內捍外之象故利禦寇止而不進與初二相守則家道成而嗣育宜矣

六四鴻漸于木或得其桷无咎象曰或得其桷巽以順也

桷平柯也鴻連趾不能握枝得平柯則可安四

陰柔居大臣之位處九三陽剛之上事九五剛明之君難以自安猶鴻漸于木非所據也然柔而得正又巽體能下巽于三上順于五不爲詭隨之行而得柔中之道則上可獲君下可信友猶鴻漸木而得其桷也如此則高而不危何咎之有或者難必之辭

九五鴻漸于陵婦三歲不孕終莫之勝吉象曰終莫之勝吉得所願也

大阜曰陵五以剛中居尊故象鴻漸于陵下有六二柔中之臣應而猶三歲不孕者何蓋五雖

以陽剛勝然漸卦巽體則精明寬裕自是並行  
原无好大喜功之心六二以柔中之德知上意  
嚮故凡所動作舒徐有漸亦无急功謀利之念  
且三陵二則多忌四比五則生疑所以三歲不  
孕然君臣合德終非基間所能勝相得益章志  
願自遂故吉

上九鴻漸于陸其羽可用爲儀吉象曰其羽可用  
爲儀吉不可亂也

卦以漸進爲義陸當作達雲路也蓋士人出處  
惟時知止不殆弗畏入畏自古戒之自干而磐



而陸而木貴顯極矣五爲君位躋于九陵是爲  
僭逼豈不殆哉于是棄冠履如敝屣飄然物外  
高出塵寰之表出處不亂名節兩全譬如鴻飛  
冥冥人但仰視其羽以爲儀法而已寧有繒繳  
之加乎漸之道必如是乃吉



兌下  
震上

歸妹征凶无攸利

禮諸侯一娶九女嫡夫人及左右媵皆以娣姪  
從妹者娣之屬也咸二少恒二長皆以類歸震  
爲長男兌爲少女少女而歸長男非類也乃妹

之從嫡者耳姊不可以先嫡征則越禮犯分何利之有无攸利所謂凶也孔子以扶陽爲義故彖傳言柔乘剛夫隨卦亦震動兌說而元亨利貞者何蓋隨動而說陽先陰隨正也故吉歸妹說而動陰先陽隨邪也故凶

彖曰歸妹天地之大義也天地不交而萬物不興歸妹人之終始也說以動所歸妹也征凶位不當也无攸利柔乘剛也

妹本卑賤而曰天地大義人道終始者何蓋天地交則生物男女交則生人然有娶妻而不生

子者則人道滅絕終而无始矣故先王制禮諸  
侯一娶九女所以廣繼嗣預爲人道計也是妹  
之與嫡雖有尊卑其關係均重有嫡不可无妾  
故曰天地大義但嫡以分勝主嚴妹以情勝貴  
和故曰說以動所歸妹也位不當者三以陰居  
陽性多躁且爲兌主四以陽居陰雖爲震主而  
情易動故戒以征凶征卽爻辭所謂須也三躁  
進四蠱惑則陰陽反常嫡妾亂分惟家之索矣  
故曰无攸利柔乘剛也聖人致戒見四當操震  
權以正嫡妾之分使人道有終始而不昧天地

之大義耳

象曰澤上有雷歸妹君子以永終知敝

震動于上而兌說之是妹之逢迎蠱惑以徼寵  
澤也兌說于下而震爲動是君之溺愛淫昵以  
開寵倖也其流之弊將妾並后婦乘夫假雷霆  
之威操福澤之權無所不至矣履霜堅冰其機  
如此故君子觀其象以逆料其終而知其敝之  
必然也蓋閨門王化之原歸妹在于永終永終  
在于知敝不能正其始而欲全其終也得乎

初九歸妹以娣跛能履征吉象曰歸妹以娣以恒

也跛能履吉相承也

娣姪之從嫡以歸于諸侯分有尊卑初居下位最卑而有陽剛之性才任使令故爲跛能履之象征者進供職役承嫡以事夫也夫位卑則得其常職承嫡則可以展舒故彖云征凶而此獨言征吉以恒承則不嫌于進也

九二耿能視利幽人之貞象曰利幽人之貞未變常也

不言歸妹承初爻也二比初稍尊然亦不失爲賤品以其陽剛之體乃娣姪之有才智而能承

望顏色以事人者故象眇能視眇者言分卑才  
鉅非目小偏盲之說幽人幽靜之人也蓋有才  
而无德以將之鮮有不爲權寵所移而變其常  
者故以幽貞爲利詩云婦無公事休其蠶織又  
云哲婦傾城此之謂也本義云上有正應而陰  
柔不正賢女而配不良恐有碍九四卦主

六三歸妹以須反歸以娣象曰歸妹以須未當也  
須待也三比二又稍尊且爲兌主彖所謂征凶  
者此爻也蓋娣待嫡而行不當自擅須者盛容  
飾以待歸則變其常分而挾綠衣上僭之心矣

情不正道不當誰其與之四愆期故三反歸以因也謂反而因于姊妹之列也詩云肅肅宵征寔命不同引分以自安此反歸以娣之意也

九四歸妹愆期遲歸有時象曰愆期之志有待而行也

四居上體爲成卦之主長男受少女之歸者也雖是陽剛震體而居于陰位愆根未淨不能不爲允三所說而動故以愆期勉之期六三以須之期也愆過遲待也待五之歸妹也志在是故愆其期如此則无征凶之危而嫡妾有定分矣

六五帝乙歸妹其君之袂不如其娣之袂良月幾望吉象曰帝乙歸妹不如其娣之袂良也其位在中以貴行也

此歸妹之主謂帝女釐降而以娣妹從之也柔中居尊有中德而不事外飾故袂不如其娣之良月陰精受日之光后德之象幾望光將滿也惻惻無華毋儀貞靜是可以配君而主祭矣貴在德而不在儀德至于中貴之極也故曰以貴行文王后妃有關雎樛木之德以致螽斯麟趾之應是已彖言柔乘剛故此贊中宮之賢見其



御妾媵无有嫉妬而爲姊妹者益不可躁進以  
犯征凶之戒四益當善動以成刑于之化也

上六女承筐无實士刲羊无血无攸利象曰上六  
无實承虛筐也

此爻陰柔居五上處動之極乃姊妹之有齒而  
无德者故待年于國而嫡不與之偕行婚期已  
過又難以他適而苟合故其象如此蓋嫁必有  
奩承筐以奉舅姑也娶必告廟刲羊以瘞祖考  
也上无所歸則承筐刲羊之禮廢矣何利之有


易象管窺卷之十

終

易象管窺卷之十一

明嘉禾後學廣寓居士黃正憲著

男承鼎編次



離下  
震上

豐亨王假之勿憂宜日中

離明于下震動于上則天地民物之間无一事  
不彰著无一事不振作故亨此豈區區智術所  
可致必王者能假之耳蓋王者乃天縱之聖人  
繼離明以畢照法震動而有爲所以能致豐亨  
之治也然聖人治不忘亂安不忘危何以勿憂

蓋致豐之本卽保豐之道王者之心常明常動  
常如日之中天幽隱畢照魑魅潛消不知其爲  
豐也知其爲豐便不能無憂矣故曰仁者不憂  
唐虞君臣言儆戒而不言憂卽此意也

彖曰豐大也明以動故豐王假之尚大也勿憂宜  
日中宜照天下也日中則昃月盈則食天道盈虛  
與時消息而況於人乎況於鬼神乎

明著動變此豐亨之治卽王者之心王者有此  
心卽有此治故曰尚大常有此心卽常有此治  
故曰勿憂宜日中若消息盈虛乃造化必然之

數天地鬼神所不能違者使治道盛衰亦不能  
逃乎數聖人豈能无憂卽憂之亦无益于數也  
文王係彖灼見得盛衰之權不在天而在人孔  
子謂舜禹有天下而不與正是常明常動无憂  
无樂氣象說者乃云不以天下爲樂而以天下  
爲憂此巢由務光之流耳

象曰雷電皆至豐君子以折獄致刑

雷動則萬物震起離明則萬物畢顯合來方成  
個豐當此豐亨世界如何有事于刑獄蓋世道  
雖大亨通人心不能無僞如有虞府修事和從

欲風動豈不是豐而士師之命象刑之明猶惓惓焉可見刑獄非聖人之得已也獄情至隱非電之明不折刑戮至慘非雷之威不斷噬嗑以立法言豐以用法言

初九遇其配主雖旬无咎往有尚象曰雖旬无咎過旬災也

初與四均爲陽剛而爻位相值有敵配之義然初離體其德明四震體其德動明待動而有所施則四又初之主也故象遇其配主旬古均字謂皆陽也在他卦以陽遇陽則爲敵應不相與

當豐之時人心懈弛上下玩愒必明動相資則  
往而有功可尚故无咎但初陽居陽位四陽居  
陰位易于相勝必隨四而動則可若陽剛稍過  
則凌逼之嫌不免災所由生也焉得无咎

六二豐其蔀日中見斗往得疑疾有孚發若吉象  
曰有孚發若信以發志也

蔀結草障蔽于四周也豐之時萬卉交作品類  
雜陳故其象爲豐其蔀君臣當此不可無整飭  
修明之功也二雖離體但居下體則其光未盛  
蒙翳昏昧而五以陰柔居君位亦非衆陽之宗

謂之斗則可謂之日則不可二仰承之故爲日  
中見斗之象主旣柔暗二又以陰柔往兩柔相  
遇徒致猜疑忌疾而已故必積誠以感動之乃  
可發其順從之志也

九三豐其沛日中見沫折其右肱无咎象曰豐其  
沛不可大事也折其右肱終不可用也

沛旆通嫖搖不定之物三在下體之上豐道方  
盛盛者衰之漸其勢危艱故象豐其沛沫斗旁  
小星三與上六相應有日中見沫之象豐亨之  
世只須保守不必大有所事三陽剛躁動上六

陰柔无助如人只一右手去做事終爲難濟故有折其右肱之象然以離明之體猶能燭事勤勞盡瘁人臣之義何咎之有

九四豐其蔀日中見斗遇其夷主吉象曰豐其蔀位不當也日中見斗幽不明也遇其夷主吉行也四雖震主而以陽居陰剛斷不足又與柔君相比君相保治之主而俱牽于陰柔故與二同象然二離體日之方中也四已過離日中則昃也見斗雖同而日光較微矣故曰幽不明夷平等也指初九言初遇四爲際遇四遇初爲禮遇權




在四不在初當豐而遇暗主下就同德此猶文王當紂之世獨與太公閔散之輩同心協力國事猶可支持故吉

六五來章有慶譽吉象曰六五之吉有慶也

五柔暗之君本不足致慶譽然初二三四才雖不同皆從五者也五能招來而章顯之則衆賢和朝豐亨可保慶集厥躬聲聞天下豈倖致哉上六豐其屋蔀其家闕其戶聞其无人三歲不覿凶象曰豐其屋天際翔也闕其戶聞其无人自藏也

此陰柔小人專天寵以自豐潤其身者故有豐  
屋蔀家之象陰中虛象戶戶內皆安危利菑之  
人无益于成敗故曰聞其无人雖與九三爲應  
然三以无助而自折其肱矣隔三位故云三歲  
不覲誰與通其明而免其禍哉祗自取滅亡而  
已



艮下  
離上

旅小亨旅貞吉

旅羈旅也古者寄公寓客之類山止于下火炎  
于上離其所止旅之象也小陰也旅之時物皆

主而我爲客境變于前最爲難處處旅之道宜  
于用柔而柔貴于正蓋人情尚通則依回取容  
亦豈无一時之遇然可謂之亨不可謂之吉孔  
子微服過宋柔道也而主司城貞子則貞矣  
彖曰旅小亨柔得中乎外而順乎剛止而麗乎明  
是以小亨旅貞吉也旅之時義大矣哉

旅之體六五居外卦之中順乎上下二陽已隨  
物轉不泥故常虚心求助屈已下賢之謂也旅  
之德艮止于內而離麗于明安恬淡泊不輕舉  
動識微見幾知所趨避之謂也此旅之正道故

吉人情羈跡旅處以爲失意之時不能拘拘于  
小節不知流離顛沛正君子堅志熟仁之機豈  
可輕意放過故曰旅之時義大矣哉

象曰山上有火旅君子以明慎用刑而不留獄

館舍所以羈旅犴狴所以繫囚羈旅之人聖人  
猶憫之而欲其柔貞以免禍况獄者生離死別  
之所聖人有深痛焉故象以獄繫情見乎辭矣  
明法乎離慎法乎艮蓋欲刑且止哀矜出罪之  
意也夫明慎則殄戮開釋兩無停滯何用留獄  
後世法網太密有連逮至數百人囚繫終身不

釋者固爲苛刻有駕言養姦遺害以多殺爲能  
遂并制罔差博罔罔空虛之譽者又何慘酷哉  
初六旅瑣瑣斯其所取災象曰旅瑣瑣志窮災也  
初旅于下陰柔不正瑣屑鄙猥經營以自封植  
人不能容所以致災慶封奔吳致富君子知其  
及于殃斯之謂與蓋君子以道窮爲辱志屈爲  
災境之順逆非所論也匹夫守志三軍不可奪  
况君子乎故仲尼在陳而絃歌不衰鐘儀在晉  
而樂不忘舊不窮矣

六二旅卽次懷其資得童僕貞象曰得童僕貞終

无尤也

二三四公侯大臣之旅也柔順則能下人中正則能立已人已兩得故卽舍則安懷資則裕得僮僕之貞則无欺而有賴旅之最吉者也晉文公之奔也至楚楚享至齊秦齊秦妻之旅卽次也腹心則子犯子餘股肱則魏犢賈佗紀綱則秦之三千人得童僕貞也故終能歸霸

九三旅焚其次喪其童僕貞厲象曰旅焚其次亦以傷矣以旅與下其義喪也

三本艮主而以剛居剛上與離體之陽相敵躁

易象傳卷之二  
進犯上不戢自焚故有離火焚舍之象陰從陽  
初二三之之童僕也過剛不中御下苛暴雖以  
二之柔順不能安其身故曰喪其童僕貞蓋羈  
旅之時義當與童僕相親同其甘苦若自處逸  
樂獨以處旅之事與下情不能堪宜其喪也  
九四旅于處得其資斧我心不快象曰旅于處未  
得位也得其資斧心未快也

于處猶大雅于時處處之謂以陽剛而自居于  
柔順冀暫安其身而已非有他覬也然國君之  
待羈臣凡周養防衛自有定禮故云得其資斧

乃其心則何快哉蓋越在他邦未復其位則故國舊君之思有不能怱然者耳狐趙不欲重耳久于齊是也

六五射雉一矢亡終以譽命象曰終以譽命上逮也

此王者蒙塵而在旅者也王者无外何旅之有少康逃虞思之國宣王匿召公之家是亦旅也所謂禍亂之作天所以開聖人其旅之六五乎柔中離體文明在中可以挽人心回天命故人譽之天命之復國踐祚而不終於旅上逮謂德



達于天也離爲雉爲戈兵故曰雉曰矢射雉書  
法與天王狩于河陽同一矢亡以蒙塵之一時  
言終以譽命小往大來也

上九鳥焚其巢旅人先笑後號咷喪牛于易凶象  
曰以旅在上其義焚也喪牛于易終莫之聞也

彖云旅小亨上剛愎忤物物不能容離爲鳥爲  
火二三四互成巽鳥居木上而遇火焚巢之象  
也三四五互成兌兌爲笑離爲目有出涕號咷  
象始也剛明自任終也不戢自焚故先笑後號  
離彖曰畜牝牛吉六五爲牛上驕亢而不下比

故云喪牛于易剛躁而无柔順以濟之故有焚  
巢之凶而終莫與聞也

三三

巽上

巽小亨利有攸往利見大人

巽入也不止卑順之義凡有所遲疑顧慮從權  
變而入者皆巽也蓋天下之事值其常則正行  
不泥值其變則當委曲巽順以合乎經如父傳  
子臣事君常也然堯舜遇朱均則不傳子而傳  
之賢湯武遇桀紂則順乎天而應乎人皆巽順  
以從權也故曰巽以行權此唐虞三代之時或

以治繼治或以仁易暴各利有攸往而謳歌訟  
獄之歸簞食壺漿之迎天下遂利見之願耳小  
柔也陽剛以陰柔而亨也太剛則折故巽之用  
最大先儒乃云巽非全德之卦止可用以申命  
謬矣或曰堯舜揖讓可謂巽以行權矣湯武革  
命豈得謂之小亨哉曰此不可執一論也聖人  
凡事聽命于天天命未絕乎桀紂則湯進伊尹  
而至五就武十二年尚不觀兵固以小亨之道  
自處也及帝用不臧須臾罔念則天意已去桀  
紂而屬湯武矣于是有伐夏戎商之舉是委曲

巽順以從天此代終之事地道也臣道也湯曰  
予畏上帝不敢不正武曰予弗順天厥罪惟均  
此翼翼昭事之心亦不可不謂之小亨也

彖曰重巽以申命剛巽乎中正而志行柔皆順乎  
剛是以小亨利有攸往利見大人

巽爲風命令鼓衆之象故王者用之申命申重  
也丁寧反覆之意非是兩命二五雖據用事之  
地而成卦之主在初與四則二五之剛中皆以  
巽順爲主剛柔相濟所以上下志同而命無不  
行下皆順乎上而利往利見也不然下雖欲巽

乎上而有恣睢暴戾之私則令有止格民亦何樂于利見哉

象曰隨風巽君子以申命行事

風行相繼无物不入巽之象也君子欲行政事必申命令於先以致丁寧反覆之意則命之人者深而事之行无阻礙亦如風之相繼无物不入矣

初六進退利武人之貞象曰進退志疑也利武人之貞志治也

初爲民象爲卦主書云可畏非民孟子云民爲

貴則治亂之權在焉故謂之武人陰柔狐疑進退靡常撫之則后虐之則仇者也上焉者可徒以剛克耶小人有勇而无義則亂故勉之以貞欲其以順上爲正也志疑志治所謂民心无常也

九二巽在牀下用史巫紛若吉无咎象曰紛若之吉得中也

以九居二二陰爲偶有牀象巽指初言下牀之足也足爲牀之本足牢固則牀安民爲國之本民柔順則國安初操進退之權挾武人之志至

可畏也非誠意以感孚之不能使之從又二承五之令以致之民巽乎中正有感孚之道焉史謂祭祀時作策書以告神者巫謂祓禳時爲歌舞以事神者紛若雜出之貌猶言多方也語云使民如承大祭書云勸之以九歌是已旣用史又用巫亦重申之意紛若似煩擾而云吉者以剛而巽乎中也

九三頻巽吝象曰頻巽之吝志窮也

頻數也以陽居陽過剛不中道未足以感孚而刑驅勢迫以期于必入上煩密則下无所容是

縱之使逸也老子云法令滋章盜賊多有此之謂也各能免乎二巽乎中正則志行三剛而中則志窮于此見命令雖爲治者所不可廢而所以入人有出于命令之外者矣

六四悔亡田獲三品象曰田獲三品有功也

二三四皆承君以巽天下者四陰柔才不勝任若有悔然上順于五爲巽乎中正下順于二三受陽剛以自輔一順而獲三陽之助如蒐田而獲君庖賓客乾豆三品也有功則无悔矣漢丙吉上遇宣帝之勵精下伍魏相之嚴毅而有不



易象管見 卷之十一  
伐寬厚之譽庶幾近之

九五貞吉悔亡无不利无初有終先庚三日後庚三日吉象曰九五之吉位正中也


此申命之主純剛重巽疑于頻厲然下比六四巽乎中正而志行故曰貞吉悔亡无不利初終專以申命行事言初內卦先庚三日也終外卦後庚三日也易中事期多以六日爲限如七日來復七日得之類取庚者何以申爲主也申在庚丁之間伏羲卦位巽居西南庚西方金也申未離西故曰先庚金行肅殺風氣凜冽人所畏

懼雖有巽命入之未深文王重之而巽居東方  
巳位屬木生火克金故曰後庚風氣和解民志  
舒鬯而後能深入重巽則能行事而无不利故  
曰无初有終

上九巽在牀下喪其資斧貞凶象曰巽在牀下上  
窮也喪其資斧正乎凶也

資以德言斧以權言兼德與權而後可以入人  
如九五也是也上九居卦外與初相遠以德則剛  
而不中喪其資矣以權則窮而无位喪其斧矣  
无德則不足以善俗无權則不足以行令如是

而欲正天下而使之巽順乎則下反其令上罪其專取凶之道也



兌下  
兌上

兌亨利貞

陽主發散陰主巽順卦剛動于中而柔順于外則陰陽和鬯所以爲兌天地說則萬物生人心說則萬事通故亨然兌之所以能亨者以利貞也蓋內有剛中之德則以已說人必不至于和而流以人說已必不至說非其道是以亨耳剛中而外非柔則趨睢暴戾柔中而剛在外則色

厲內荏皆非貞也

彖曰兌說也剛中而柔外說以利貞是以順乎天而應乎人說以使民民忘其勞說以犯難民忘其死說之大民勸矣哉

天道至正而其眎聽在民民心說故天心說順乎天方應乎人革言天人之說乎湯武此言天之所以說者以正也忘勞忘死不知其勞與死耳知則不能忘矣耕食鑿飲與披堅執銳同一光景此帝力何有王民皞皞氣象說道之極也民勸言以說自勸也勸民與民勸相去遠矣

故聖人大之曰說之大民勸矣哉

象曰麗澤兌君子以朋友講習

麗附也澤有源泉故水潄而不涸兩澤相潤兌之象也說者心體也惟理義足以說心此必待朋友講明服習然後心無障礙而說自心生彼此交暢此卽論語時習之說也不說則志不通說而不正則有淫比之私卦剛中而柔外說以利貞故君子取焉

初九和兌吉象曰和兌之吉行未疑也

和而說情之正也人之情本无弗正雜于人爲

而後有三三之瀆故真情所發无弗和也此爻陽剛初動上无係應則動以天而不雜于人發而中節之謂和故曰和兌吉行未疑也見人當保守此和以行天下達道耳

九二孚兌吉悔亡象曰孚兌之言信志也

信于其類謂之孚此爻陽剛中正不牽于欲陽居陰位則以柔濟剛而不傷於躁此中節之和正志也故旣孚于初九同德之士又孚于九四同德之臣又孚于九五同德之主吉莫大焉卽三與上容悅小人始雖未洽終且信服而不敢

干以私所謂至誠未有不動者也故悔亡  
六三來兌凶象曰來兌之凶位不當也

陰柔之才不中不正而爲兌之主處上下四陽  
之中下則欲干譽百姓淫比同體上則欲取媚  
相臣逢迎天子無所不用其佞故曰來兌又三  
上同類一引一來比周黨惡此國家大蠹故直  
繫之曰凶

九四商兌未寧介疾有喜象曰九四之喜有慶也  
四爲大臣方與九二同德之臣自結于五而五  
爲兌主有三上小人日窺矚于前後一中其術

則二四之孚將疎于五矣故爲四者旣思開誠  
布公以自固又慮三與上陰構以疎其交傍徨  
躊躇故有商兌未寧之象傳曰美疾不如藥石  
三與上五之疾也四介于其間以剛輔五而議  
二陰五之針砭也苟非介而隔之使不得近于  
五其不爲疾者鮮矣故曰介疾有喜言疾去而  
後有喜也非四之私喜天下國家之大慶也先  
儒以四承五比三不能決而商度大謬

九五孚于剝有厲象曰孚于剝位正當也

剝以上六言夫剝以五陰剝一陽而兌之一陰




亦謂之剝者君爲陽剛之主君心一搖則衆正皆敗故也夫五剛中正位何以孚于上蓋君德陽剛志氣清明不但與二四同德相孚雖三與上之小人亦相信畏服耳但窺伺之奸時伏于側斯須不謹則乘間入之故曰有厲危之也帝堯以如神之智洞燭共工兜鯀之奸而僉舉姑試遂貽九年洪水之災厲孰大焉聖人之意蓋曰剛中之主且有危厲况中材闇弱者乎

上六引兌象曰上六引兌未光也

六三上六皆兌之小人六三履非其位而處於

二陽之間以求說爲兌者故曰來兌言不招而  
自來也其心易知其爲害淺上六超然卦外乃  
小人之託於无求以沽名釣譽者也故曰引兌  
言致九五之說已也有來之心而无來之迹始  
則托隱遯以爲名高而引君之兌繼則乘君寵  
以售已兌而貽國之危其心難知其爲害深故  
于九五曰有厲戒其爲上引也此曰未光言五  
爲上引則君道有虧闇也相首尾之詞若以未  
光爲上六則不待言矣



坎下  
巽上

渙亨王假有廟利涉大川利貞

渙散也風行水上有離披解散之象又坎內巽外爲禍亂內起人心外散之象何以能亨蓋天下之渙起于險難之時故萃渙者必先濟險欲濟險者必須萃人心人心非精誠不可萃而精誠之萃莫嚴于在廟之時故云王假有廟而卦自否變剛自四來居二一陽在二陰之中王在廟中象也則剛中內固而萃渙之道在我矣故曰剛來而不窮柔自二往居四以成巽爲得位于外則合初三之陰以從陽无有壅闕而陽剛

之在坎中者達而爲九五矣陽一也在坎中則爲萃渙之主在巽中則爲濟渙之主故曰上同是二五之同由四陰之得位也坎爲大川巽爲木爲風巽在坎上水乘舟也乘舟而遇風則大川可涉陰順而從陽則大難可夷渙之所由亨也利貞者恐其恃衆心之萃而舉事之疎耳假廟是萃渙之本利涉是濟渙之才

彖曰渙亨剛來而不窮柔得位乎外而上同王假有廟王乃在中也利涉大川乘木有功也

蘇長公曰世之方治也如大川安流而就下及

其亂也潰溢四出而不可止水非樂爲此蓋必有逆其性者泛溢而不已逆之者必衰其性必復水將自擇其所安而歸焉古之善治者未嘗與民爭而聽其自擇然後從而導之渙之爲言天下流離渙散而不安其居此宜經營四方之不暇而其彖曰王假有廟其象曰先王以亨于帝立廟何也曰犯難而爭民者民之所疾也處危而不媮者衆之所恃也先王居渙散之中安然不爭而自爲長久之計宗廟旣立亨帝之位定而天下之心始有所繫矣

象曰風行水上渙先王以亨于帝立廟

渙非精誠不萃精誠惟郊祀則聚故亨帝立廟  
中庸所謂明乎郊社之禮禘嘗之義治國其如  
視諸掌者意蓋如此

初六用拯馬壯吉象曰初六之吉順也

拯救也坎爲美脊之馬二有剛中之才故稱馬  
壯初以陰柔處險下民渙之始也爲上者急用  
救之能當此任者其九二乎初能順二以進必  
能濟而不終于渙也故吉

九二渙奔其机悔亡象曰渙奔其机得願也

奔竭蹙之狀從馬壯來机艱危之貌以陷險言  
二當渙之時居萃渙之位目擊人民流散不忍  
坐視幡然自悔但身在險中勢方危殆故有奔  
其机之象而陽剛健體不惜馳驅之勞以自畢  
其願願得則悔亡矣

六三渙其躬无悔象曰渙其躬志在外也

險難之世人民渙散三將出險思歸其主而以  
柔居剛外與上應躁進輕動有不擇其主而歸  
之志故象渙其躬无悔謂雖失所依歸而不自  
悔者也

六四渙其羣元吉渙有丘匪夷所思象曰渙其羣元吉光大也

羣聚也渙者初三四萃渙者二五初渙而在遠三渙而无歸四得位于外合初三以順二而上同于五則渙者聚矣渙而聚天下始有可收之漸蓋萃渙雖二五之能事非四聚黨以上同則亦難以成一統故曰光大大陽也有光于陽也十六井曰丘當渙之時分崩離析初與三陰小等夷之輩无所適從豈料有成丘得主之日哉是四上有光于二五下有德于初三非元吉而



何

九五渙汗其大號渙王居无咎象曰王居无咎正位也

五爲萃渙之主四旣聚羣陰以上同則天下大勢已定于一五可正位凝命矣正位之要有二一布號令以齊衆志一散居積以收人心如武王大定之後反政釋囚散財發粟等事也如是以正位何咎之有汗取周浹不反意居儲備也上九渙其血去逖出无咎象曰渙其血遠害也血陰類也上以陽剛居五之上乃豪雄角立于

渙散之中欲萃羣陰以稱大者也今五以剛中之德爲濟渙之主自坎險中奔其杙以來素爲丘民所歸向而六四又羣其黨以上同則大勢已定天下无可爲矣上處巽極爲能謙讓巽順渙散其平時之陰黨而去以遠出則可以自全而遠害故曰无咎

易象管窺卷之十一

終